

Syed Ahmad Shahabuddin Canselor KUTKM

Archival News | Utusan Malaysia | 29/08/2003

MELAKA 28 Ogos Yang Di Pertua Negeri Melaka, Tun Syed Ahmad Shahabuddin hari ini dimasyhurkan sebagai Canselor pertama Kolej Universiti Teknikal Kebangsaan Malaysia (KUTKM) pada istiadat yang berlangsung di Dewan Seri Negeri, Ayer Keroh.

Pemasyhuran tersebut disempurnakan oleh Timbalan Menteri Pendidikan, Datuk Abdul Aziz Shamsuddin, mewakili Menteri Pendidikan, Tan Sri Musa Mohamad.

Pemasyhuran Syed Ahmad sebagai Canselor KUTKM di anggap satu langkah yang tepat berikutan kewibawaan serta kesungguhan yang dipamerkan oleh beliau dalam memajukan Melaka selaku Yang Di Pertua Negeri.

Mohd. Ali ketika mengulas pemasyhuran itu berkata, seluruh rakyat Melaka amat berbangga dengan pelantikan itu kerana ia juga merupakan satu penghormatan yang besar bagi negeri ini.

``Semoga di bawah kepimpinan dan bimbingan Tuan Yang Terutama, Tun Canselor, KUTKM akan terus membangun dengan cemerlang dan gemilang di samping membantu membangunkan negeri Melaka khasnya dan negara amnya,`` katanya.

Sementara itu ketika berucap pada majlis itu, Syed Ahmad mencadangkan kerajaan supaya menggugurkan perkataan kolej pada nama universiti itu bagi memberikan persepsi yang lebih positif kepada KUTKM dan lain-lain kolej universiti di negara ini.

Menurutnya, pengguguran perkataan kolej difikirkan perlu memandangkan KUTKM adalah setaraf dengan universiti-universiti sedia ada di negara ini.

``Langkah ini juga akan membolehkan KUTKM bergerak dengan lebih jauh di masa-masa akan datang dengan memperkembangkan bidang-bidang yang ditawarkan,`` kata beliau.

Syed Ahmad berkata, sebagai Canselor, beliau akan sentiasa memberi sokongan padu dan membantu supaya institusi pengajian tinggi awam itu muncul sebuah universiti teknikal yang inovatif dan kreatif bertaraf dunia.

Beliau menyeru warga KUTKM supaya mempersiapkan diri secukupnya bagi menghadapi persaingan yang semakin mencabar di peringkat global sekarang.

``Persaingan yang berlaku tidak lagi tertumpu kepada dalam negara semata-mata tetapi juga di peringkat antarabangsa.

``Untuk mengelakkan kita ketinggalan dalam persaingan serba mencabar ini, saya menyeru agar seluruh warga KUTKM mempersiapkan diri secukupnya,``

katanya.

(Source : Utusan Malaysia)

